

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков.

Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеву со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 6 Господи, воззвах к Тебе, услыши мя.

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Стихиры празднику

Стих: Изведи из темницы душу мою, исповедатися имени Твоему.

Днесь благодать Святаго Духа нас собра, и вси взявше Крест Твой глаголем, благословен грядый во имя Господне, осанна в вышних.

Стих: Мене ждут праведницы, дондеже воздаси мне.

Днесь благодать Святаго Духа нас собра, и вси взявше Крест Твой глаголем, благословен грядый во имя Господне, осанна в вышних.

Стих: Из глубины воззвах к Тебе Господи, Господи, услыши глас мой.

Имеяй престол Небо, и подножие землю, Бога отца Слово и Сын Соприсно-сущный, на жребяти безсловеснем смирился днесь, в Вифанию пришед. Темже дети еврейския, ветви руками держаще, хваляху гласом: осанна в вышних, благословен грядый Царь Израилев.

Стих: Да будут уши Твои, внимлюще гласу моления моего.

Имеяй престол Небо, и подножие землю, Бога Отца Слово и Сын Соприсно-сущный, на жребяти безсловеснем смирился днесь, в Вифанию пришед. Темже

дети еврейския, ветви руками держаще, хваляху гласом: осанна в вышних, благословен грядый Царь Израилев.

Стих: Аще беззакония назриши Господи, Господи, кто постоит Яко у Тебе очищение есть.

Приидите и мы днесь весь новый Израиль, яже от язык Церковь, со пророком Захарию возопиим: радуйся зело дщи Сионова, проповедуй дщи Иерусалимова: яко се царь твой грядет тебе кроток и спасаяй, и вседый на жребя осле, сына подъяремнича: празднуй яже детей, ветви руками держащи похвали: осанна в вышних, благословен грядый царь Израилев.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Приидите и мы днесь весь новый Израиль, яже от язык Церковь, со пророком Захарию возопиим: радуйся зело дщи Сионова, проповедуй дщи Иерусалимова: яко се царь твой грядет тебе кроток и спасаяй, и вседый на жребя осле, сына подъяремнича: празднуй яже детей, ветви руками держащи похвали: осанна в вышних, благословен грядый царь Израилев.

Стих: От стражи утренния до ноши, от стражи утренния, да уповае Израиль на Господа.

Честное Воскресение Твое прообразуя нам, воздвигл еси умершаго повелением Твоим, бездыханнаго Лазаря друга Блаже, из гроба четверодневна смердяща. Темже и на жребя возшед образно, якоже на колеснице носимь, языки укротевая Спасе. Сего ради и хваление приносит возлюбленный Израиль из уст ссущих, и младенец незлобивых, зрящих Тя Христе, входяща во Святый Град, прежде шести дней Пасхи.

Стих: Яко у Господа милость, и многое у Него избавление, и Той избавит Израиля от всех беззаконий его.

Честное Воскресение Твое прообразуя нам, воздвигл еси умершаго повелением Твоим, бездыханнаго Лазаря друга Блаже, из гроба четверодневна смердяща. Темже и на жребя возшед образно, якоже на колеснице носимь, языки укротевая Спасе. Сего ради и хваление приносит возлюбленный Израиль из уст ссущих, и младенец незлобивых, зрящих Тя Христе, входяща во Святый Град, прежде шести дней Пасхи.

Стих: Хвалите Господа вси языцы, похвалите Его вси людие.

Прежде шести дней Пасхи прииде Иисус во Вифанию, и приступиша к нему ученцы Его, глаголюще Ему: Господи, где хоцещи, уготоваем Ти ясти пасху. Он же посла их: идите в преднюю весь, и обрящете человека, скудель воды носяща: последуйте ему, и дому владыце рците: учитель глаголет, у тебе сотворю Пасху со ученки моими.

Стих: Яко утвердися милость Его на нас, и истина Господня пребывает во век.

Прежде шести дней Пасхи прииде Иисус во Вифанию, и приступиша к нему ученцы Его, глаголюще Ему: Господи, где хоцещи, уготоваем Ти ясти пасху. Он же посла их: идите в преднюю весь, и обрящете человека, скудель воды носяща: последуйте ему, и дому владыце рците: учитель глаголет, у тебе сотворю Пасху со ученки моими.

Слава, глас 6

Днесь благодать Святаго Духа нас собра, и вси возьмше Крест Твой глаголем, благословен грядый во имя Господне, осанна в вышних.

И ныне, глас 6

Днесь благодать Святаго Духа нас собра, и вси возьмше Крест Твой глаголем, благословен грядый во имя Господне, осанна в вышних.

Вечерний вход

Премудрость. Прости.

Свете тихий святых славы, Безсмертного, Отца Небесного, Святого Блаженного, Иисусе Христе! Пришедше на запад солнца, видевше свет вечерний, поем Отца, Сына и Святого Духа, Бога. Достоин еси во вся времена пет быти гласы преподобными, Сыне Божий, живот даяй, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, Господь воцарися, в лепоту облечеса.

Стих: Облечеса Господь в силу и препоясаса.

Стих: Ибо утверди вселенную, яже не подвижится.

Стих: Дому Твоему подобае святых, Господи, в долготу дний.

Чтения паремий

Бытия чтение (глава 40)

Призва Иаков сыны своя, и рече им: соберитесь, да возвещу вам, что срящет вас в последние дни. Соберитесь, и послушайте мене сынове Иаковли: послушайте Израиля, послушайте отца вашего. Иудо, тебе похвалят братия твоя: руке твои на плещу враг твоих: поклонятся тебе сынове отца твоего. Скимен львов Иуды, от леторасли сыне мой возшел еси: возлег уснул еси яко лев, и яко скимен, кто возбудит его Не оскудеет князь от Иуды, и вождь от чресл его, дондеже приидут отложеная ему: и той чаяние языков. Привязуй к лозе жребя свое, и к винничю жребца осляте своего: исперет вином одежду свою, и кровию гроздия одеяние свое. Радостотворны очи его паче вина, и белы зубы его паче млека.

Пророчества Софониева чтение (глава 3)

Во днеш оных, рече Моисей к сыноу Израилевым: се Господа Бога твоего небо, и небо небесе, земля и вся елика суть на ней. Обаче отцы ваши произволи Господь любити их: и избра семя их по ним, вас паче всех язык, в день сей. И обрежете жестосердие ваше, и выя ваша не ожесточите ктому. Ибо Господь Бог ваш, сей Бог богов, и Господь господей: Бог великий, и крепкий, и страшный, иже не дивится лицу, ниже возьмет дар. Творяй суд пришельцу, и сиру, и вдовице, и любит пришельца, дати ему хлеб и ризу. И возлюбите пришельца, пришельцы бо бесте в земли египетстей. Господа Бога твоего да убоишися, и тому единому послужиши, и к нему прилепишися, и именем его кленешися. Той хвала твоя, и той Бог твой, иже сотворил ти есть великая и славная сия, яже видесте очи твои.

Пророчества Захариина чтение (глава 3)

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их: И еже от нас шестивие сокрушение, они же суть в мире. Ибо пред лицом человеческого аще и муку примут, упование их безсмертия исполнено: И в мале наказани бывше, великими благодетельствовани будут, яко Бог искуси я, и обрете их достойны себе. Яко злато в горниле искуси их, и яко всеплодие жертвенное прият я. И во время посещения их возсияют: и яко искры по стеблию потекут. Судят языком, и обладают людьми, и воцарится Господь в них во веки. Надеющися нань разумеют истину, и вернии в любви пребудут ему. Яко благодать и милость в преподобных его, и посещение во избранных его.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранитися нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобае хвала. Тебе подобае пение, Тебе слава подобае, Отцу и Сыну и Святому Духу, ныне и присно и во веки веков. Аминь.

Просительная ектения

Исполним вечернюю молитву нашу Господеви...

Лития

Глас 1

Всесвятый Дух, апостолы научивый глаголати иными странными языки, Той детем еврейским неискусозлобным повелевает звати: осанна в вышних, благословен грядый царь Израилев.

Собезначальный и соприисносущный, Сын и Слово Отчее, на жребяти безсловесном седя, прииде днешь во град Иерусалим: егоже херувими со страхом зрети не могут, дети восхвалиша, с ваием и ветвьми, хвалу таинственно воспевающе: осанна в вышних, осанна Сыну Давидову, пришедшему спасти от прелести весь род наш.

Прежде шести дней Пасхи, глас Твой услышася Господи, во глубинах адовых: темже и Лазаря четверодневна воздвигл еси. Дети же еврейския взываху: осанна Боже наш, слава Тебе.

Глас 2

Входящу Ти Господи во Святый Град, на жребяти седа, потщался еси приити на страсть, да совершиши закон и пророки. Дети же еврейския воскресения победу предвозвещающе, сретаху Тя с ветвьми и ваием, глаголюще: благословен еси Спасе, помилуй нас.

Слава Тебе Христе, в вышних сидящему на престоле, и ныне чаемому с Честным Твоим Крестом. Темже веселится дщи Сионова, радуются языцы земнии, ветви держат дети, ризы же ученцы, и вся вселенная научися вопити Тебе: благословен еси Спасе, помилуй нас.

Слава, и ныне, глас 3

Прежде шести дней бытия Пасхи, прииде Иисус во Вифанию, воззвати умерша четверодневна Лазаря, и проповедати Воскресение. Сретоша же его и жены, Марфа и Мариа сестры Лазаревы, вопиюще к нему: Господи, аще бы еси был zde, не бы умерл брат наш. Тогда глагола к ним: не предрекох ли вам: веруяй в Мя, аще и умрет, жив будет: покажите ми, где положили есте его и вопияше к нему Зиждитель всех: Лазаре, гряди вон.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя Богатыя: молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна: святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийскаго, чудотворца: святых равноапостольных Мефодия и Кирилла, учителей словенских: святых равноапостольных великаго князя Владимира и великия княгини Ольги; иже во святых отец наших, святителя Михаила, перваго митрополита Киевскаго; первосвятителей Московских и всея Руси: Петра, Алексия, Ионы, Макария, Филиппа, Иова, Ермогена и Тихона; митрополитов Московских Филарета и Иннокентия; святителей имя рек (епархиальных): святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго имя рек, егоже есть храм и егоже есть день), и всех святых: молим Тя, многомилостиве Господи, услыши нас, грешных, молящихся Тебе, и помилуй нас.

Гомподи помилуй - 40 раз.

Еще молимся о Великом Господине и Отце нашем Святейшем Алексии, Патриархе Московском и всея Руси, о Господине нашем Преосвященнейшем епископе (имя рек) и о всем во Христе братстве нашем, и о всякой души христианстей, скорбящей же и озлобленной, милости Божия и помощи требующей: о покровении града сего и живущих в нем (или веси сея и живущих в ней; или святыя обители сея и живущих в ней); о мире и состоянии всего мира; о благостоянии святых Божиих Церквей: о спасении и помощи со тщанием и страхом Божиим труждающихся и служащих отец и братий наших: о оставльшихся и во отшествии сущих: о исцелении в немощех лежащих: о успении, ослабе, блаженней памяти и оставлении грехов всех преждеотшедших отец и братии наших, zde лежащих и повсюду, православных; о избавлении плененных, и о братиях наших во службах сущих, и о всех служащих и служивших во святем храме сем (аще во обители: во святей обители сей) рцем.

Господи помилуй - 50 раз.

Еще молимся о еже сохранитися граду сему (или веси сей), и святому храму сему (аще во обители: святей обители сей), и всякому граду и стране от глада, губительства, труса, потопа, огня, меча, нашествия иноплеменников и междоусобных брани: о еже милостиву и благоуветливу быти благому и человеколюбивому Богу нашему, отвратити всякий гнев, на ны движимый, и избавити ны от належашаго и праведнаго Своего прещения, и помиловати ны. Господи помилуй - 3 раза.

Еще молимся, и о еже услышати Господу Богу глас моления нас, грешных, и помиловати нас.

Господи помилуй - 3 раза.

Услыши ны, Боже, Спасителю наш, Упование всех концов земли и сущих в мори далече: и милостив, милостив буди, Владыко, о гресех наших и помилуй ны. Милостив бо и Человеколюбец Бог еси, и Тебе славу возсылаем, Отцу и Сыну и Святому Духу, ныне и присно и во веки веков. Аминь. Мир всем. И духови Твоему. Главы наша Господеви приклоним. Тебе, Господи.

Владыко многомилостиве, Господи Иисусе Христе Боже наш, молитвами Всепречистыя Владычицы нашея Богородицы и Приснодевы Марии, силою Честнаго и Животворящаго Креста, предстательства честных Небесных Сил безплотных, честнаго славнаго пророка, Предтечи и Крестителя Иоанна, святых славных и всехвальных апостол, святых славных и добропобедных мучеников, преподобных и Богоносных отец наших, иже во святых отец наших и вселенских великих учителей и святителей Василия Великаго, Григория Богослова и Иоанна Златоустаго, иже во святых отца нашего Николая, архиепископа Мирликийскаго, чудотворца; святых равноапостольных Мефодия и Кирилла, учителей словенских; святых равноапостольных великаго князя Владимира и великия княгини Ольги; иже во святых отец наших, святителя Михаила, перваго митрополита Киевскаго; первосвятителей Московских и всея Руси: Петра, Алексия, Ионы, Макария, Филиппа, Иова, Ермогена и Тихона; митрополитов Московских Филарета и Иннокентия; святителей имя рек (епархиальных): святых и праведных Богоотец Иоакима и Анны (и святаго имя рек, егоже есть храм и егоже есть день), и всех святых Твоих: благоприятну сотвори молитву нашу, даруй нам оставление прегрешений наших, покрой нас кровом крилу Твоею, отжени от нас всякаго врага и супостата: умири нашу жизнь, Господи; помилуй нас и мир Твой, и спаси души наша, яко благ и Человеколюбец. .Аминь.

На стиховне стихиры глас 8

Радуйся и веселися граде Сионе, красуйся и радуйся Церкви Божия: се бо Царь твой прииде в правде, на жребяти седя, от детей воспеваемый: осанна в вышних, благословен еси, имеяй множество щедрот, помилуй нас.

Стих: Из уст младенец и ссуших совершил еси хвалу.

Прииде Спас днесь во град Иерусалим, исполнити писание, и вси прияша в руки ваиа: ризы же подстилаху Ему, ведуще, яко Той есть Бог наш, емуже херувими вопиют непрестанно: осанна в вышних, благословен еси, имеяй множество щедрот помилуй нас.

Стих: Господи Господь наш, яко чудно имя Твое по всей земли.

На херувимех носимый, и певаемый от серафим, возсел еси на жребя давидски Блаже: и дети Тя воспеваху Боголепно, иудее же хуляху беззаконно: стропотное языков, седалище жребца прообразоваше, из неверия в веру претворяемое. Слава Тебе Христе, едине милостиве и Человеколюбче.

Слава, глас 3

Днесь благодать Святаго Духа нас собра, и вси вземше Крест Твой глаголем, благословен грядый во имя Господне, осанна в вышних.

И ныне, глас 3

Днесь благодать Святаго Духа нас собра, и вси вземше Крест Твой глаголем, благословен грядый во имя Господне, осанна в вышних.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святыи Боже, Святыи Крепкий, Святыи Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святыи, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь, глас 1

Общее Воскресение, прежде Твоя страсти уверяя, из мертвых воздвигл еси Лазаря Христе Боже. Темже и мы яко отроцы победы знамения носяще, Тебе

Победителю смерти вопием: осанна в вышних, благословен грядый во имя Господне. (дважды).

Глас 4

Спогребшеся Тебе крещением Христе Боже наш, безсмертныя жизни сподобихомся Воскресением Твоим, и воспевающе зовем: осанна в вышних, благословен грядый во имя Господне.

Буди имя Господне благословенно от ныне и до века (трижды)..

33-й псалом

Благословлю Господа на всякое время, выну хвала Его во устех моих.
О Господе похвалится душа моя: да услышат кротцыи и возвеселятся.
Возвеличите Господа со мною, и вознесем имя Его вкупе.
Взысках Господа, и услыша мя, и от всех скорбей моих избави мя.
Приступите к Нему, и просветитесь, и лица ваша не постыдятся.
Сей нищий воззва, и Господь услышай, и от всех скорбей Его спасе и.
Ополчится Ангел Господень окрест боящихся Его, и избавит их.
Вкусите и видите, яко благ Господь: блажен муж, иже уповае на Нань.
Бойтесь Господа вси святии Его, яко несть лишения боящимся Его.
Богатии обнищаша и възалкаша: зыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).
Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози встают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене!...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явися нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь, глас 1

Общее Воскресение, прежде Твоя страсти уверяя, из мертвых воздвигл еси Лазаря Христе Боже. Темже и мы яко отроцы победы знамения носяще, Тебе

Победителю смерти вопием: осанна в вышних, благословен грядый во имя Господне. (дважды).

Слава и Ныне глас 4

Спогребшеся Тебе крещением Христе Боже наш, безсмертныя жизни сподобихомся Воскресением Твоим, и воспевающе зовем: осанна в вышних, благословен грядый во имя Господне.

Чтение кафизм

Господи помилуй Зр., Слава,
И ныне... читает кафизму в 3 Славы

Малая ектения,

Паки и паки миром Господу помолимся...

По 1-м стихословии, седальны, глас 4

С ветвьми умно очищени душами, якоже дети Христа восхвалим верно, велегласно зовуще Владыце: благословен еси Спасе в мир пришедый, спасти Адама от древния клятвы, Духовно быв Человеколюбче новый Адам, якоже благоволил еси: вся Слове к полезному устройвый, слава Тебе.

Слава, и ныне, иный седален, глас 4

Четверодневна Лазаря от гроба возставивый Господи, вся научил еси вопити с ваием и ветвьми Тебе: благословен еси Грядый.

Господи помилуй Зр., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны, глас 4

Над другом Твоим Христе слезы точиши тайно, и воздвизаеши из мертвых Лазаря лежаща мертва, в немже сострадание показал еси человеколюбно: уведевше же Твое пришествие Иисусе, множество младенец изыдоша днесь, в руках ваиа держаще, осанна Тебе взывающе: благословен еси, во еже мир спасти пришедый.

Слава, и ныне, иный седален, глас 1.

Восхвалите согласно людие и языцы: царь бо ангельский взыде ныне на жребя, и грядет хотяй на Кресте поразити враги, яко силен. Сего ради и дети с ваием взывают песнь: слава Тебе пришедшему победителю: слава Тебе Спасу Христу: слава Тебе благословенному, единому Богу нашему.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живый во Иерусалиме. Аллилуиа (трижды).

Исповедайтеся Господеви, яко благ, яко в век милость Его. Аллилуиа (трижды).

Исповедайтеся Богу небесному, яко в век милость Его. Аллилуиа (трижды).

Малая ектения

Паки и паки миром Господу помолимся...

Седален, глас 8

На престоле херувимсте, и на жребяти возсед нас ради, и к страсти вольней достиг, днесь слышит детей возглашающих, осанна, народов вопиющих: Сыне Давидов, ускори спасти, ихже создал еси, благословенне Иисусе: на сие бо пришел еси, да разумеем славу Твою.

Слава, и ныне

На престоле херувимсте, и на жребяти возсед нас ради, и к страсти вольней достиг, днесь слышит детей возглашающих, осанна, народов вопиющих: Сыне Давидов, ускори спасти, ихже создал еси, благословенне Иисусе: на сие бо пришел еси, да разумеем славу Твою.

От юности моя мнози борют мя страсти, но Сам мя заступи, и спаси, Спасе мой.

Ненавидящий Сиона, посрамится от Господа, яко трава бо огнем будете изсохше.

Слава: Святым Духом всяка душа живится, и чистотою возвышается, светлется Троическим Единством священнотайне.

И ныне, тойже.

Антифон 2:

Возвах Тебе Господи тепле, из глубины души моя, и мне да будут на послушание Божественная Твоя ушеса.

На Господа надежду всяк кто стяжав, вышший есть всех скорбящих.

Слава: Святым Духом точатся благодатныя струи, напаяюща всяку тварь ко оживлению.

И ныне, тойже.

Антифон 3:

Сердце мое к Тебе, Слове, да возвысится, и да ничтоже усладит мя от мирских красот на слабость.

К матери своей якоже имать кто любовь, ко Господу тепльше люблением должни есмы.

Слава: Святым Духом боговедения богатство, зрения, и премудрости: вся бо в сем отеческая веления слово открывает.

И ныне, тойже.

Прокимен, глас 4: Из уст младенец и ссуших совершил еси хвалу.

Стих: Господи Господь наш, яко чудно имя Твое по всей земли.

Господу помолимся — Господи помилуй— Яко Свят еси Боже наш... Аминь.

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — Господи помилуй

Зр

Мир всем - И духови твоему.

От (Матфея или Марка или...) Святаго Евангелия чтение Слава Тебе, Господи, слава Тебе.

Чтение Евангелия.

Слава Тебе, Господи, слава Тебе.

50 псалом (чтец)

Господу помолимся.

Господи помилуй.

Господи Боже наш, седяй на херувимех, возставивый силу Твоего Сына, Господа нашего Иисуса Христа, да спасет мир Крестом, и погребением, и Воскресением своим: Егоже и ныне пришедша во Иерусалим на вольную страсть, людие седящие во тьме, и сени смертней, приемше воскресния знамения, ветви древес, и ваиа финик, Воскресение знаменующе сретоша. Сам Владыко и нас по подражанию оных, в предпразднственный сей день, ваиа и ветви древес в руках носящих соблюди и сохрани. Да якоже онии народи и дети осанна Тебе приношаху, и мы такожде в песнях и пении духовных, Животворящаго и Триневнаго Воскресния достигнем, в томже Христе Иисусе Господе нашем: с Нимже благословен еси, с Пресвятым, и Благим, и Животворящим Твоим Духом, ныне и присно, и во веки веков, аминь.

Слава Отцу и Сыну и Святому Духу. Днесь Христос входит во град Вифанию, на жребяти седяй, безсловесие разрешая язык злейшее, древле свирепеющее.

И ныне и присно и во веки веков, аминь. Днесь Христос входит во град Вифанию, на жребяти седяй, безсловесие разрешая язык злейшее, древле свирепеющее.

Помилуй мя Боже, повелицей милости Твоей и по множеству щедрот Твоих очисти беззаконие мое.

Днесь благодать Святаго Духа нас собра, и вси вземше Крест Твой глаголем, благословен грядый во имя Господне, осанна в вышних.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатыя; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — Аминь.

Канон. Глас 4
Песнь 1

Ирмос: Явишася источники бездны влаги непричастны, и открышася моря волнуемая основания бурею: манием бо запретил еси ему, изрядныя же люди спасл еси. поющия победную песнь Тебе Господи.

Из уст младенец незлобивых, и ссущих, хвалу Твоих раб совершил еси, разрушити супостата, и отмстити страстию Креста, падение древняго Адама, Древом же воскресити сего, поюща победную песнь Тебе Господи.

Хваление церковь преподобных, живущему в Сионе, Тебе Христе приносит: о Тебе же Израиль Творце своем радуется, и горы языцы противообразнии каменосердечнии, от лица Твоего возвеселишася, поюще победную песнь Тебе Господи.

Катавасиа: Явишася источники бездны влаги непричастны, и открышася моря волнуемая основания бурею: манием бо запретил еси ему, изрядныя же люди спасл еси. поющия победную песнь Тебе Господи.

Песнь 3

Ирмос: Точащий краесекомый повелением Твоим, твердый ссаша камень Израильтестии людие. Камень же Ты еси Христе и жизнь, на немже утвердися церковь зовущая: осанна благословен еси Грядый.

Мертвеца четверодневна повелением Твоим, из мертвых с трепетом ад испусти Лазаря. Воскресение бо Ты Христе и Жизнь, в немже утвердися Церковь зовущи: осанна благословен еси Грядый.

Воспойте людие Боголепно в Сионе, и молитву воздадите Христу во Иерусалиме, сам грядет во славе со областью: в немже утвердися церковь зовущи: осанна благословен еси Грядый.

Катавасиа: Точащий краесекомый повелением Твоим, твердый ссаша камень Израильтестии людие. Камень же Ты еси Христе и жизнь, на немже утвердися церковь зовущая: осанна благословен еси Грядый.

Малая ектения.

Паки и паки миром Господу помолимся...

С ветвьми воспевше прежде, с древесы последи яша Христа Бога, неблагодарнии иудее. Мы же верою непреложною присно почитающе яко благодетеля, выну вопием Ему: благословен еси Грядый адама воззвати.

Песнь 4

Ирмос: Христос грядый явственен Бог наш, приидет и не закоснит, от горы приосененныя чаши, отроковицы раждающия Неискусомужныя, пророк древле глаголет. Тем вси вопием: слава силе Твоей Господи.

Да точат веселие крепкое мастительное, горы, и вси холми, и древа дубравная да взыграют: Христа хвалите языцы, и Тому вси людие радуящися возопийте: слава силе Твоей Господи.

Крепостию царствуяй веки Господь, облечен приидет, Сего красоты же и славы, несравненно есть благолепие в Сионе. Темже вси вопием: слава силе Твоей Господи.

Пядию измеривый Небо, дланию же землю, Господь прииде, Сион бо избра, в немже жити и царствовати изволи, и возлюби люди верно вопиющия: слава силе Твоей Господи.

Катавасиа: Христос грядый явственен Бог наш, приидет и не закоснит, от горы приосененныя чаши, отроковицы раждающия Неискусомужныя, пророк древле глаголет. Тем вси вопием: слава силе Твоей Господи.

Песнь 5

Ирмос: На гору Сион взыди благовествуяй, и Иерусалиму проповедуяй, в крепости вознести глас: преславная глаголашася о Тебе граде Божий. мир на Израиля, и спасение языком.

В вышних седяй на херувимех Бог, и призираяй на смиренныя, той грядет во славе со областью, и исполнятся всяческая Божественныя хвалы его. Мир на Израиля, и спасение языком.

Сионе Божий, горо святая, и Иерусалиме, окрест очи твои возведи, и виждь собранная чада твоя в тебе: се бо приидоша издалеча, поклонитися Царю твоему. Мир на Израиля, и спасение языком.

Катавасиа: На гору Сион взыди благовествуяй, и Иерусалиму проповедуяй, в крепости вознести глас: преславная глаголашася о Тебе граде Божий. мир на Израиля, и спасение языком.

Песнь 6

Ирмос: Возопиша с веселием праведных души: ныне миру завет новый завещается, и кроплением да обновятся людие, Божия крове.

Приими Израилю Божие царство, и пребываяй во тьме, свет да узрит великий, и кроплением да обновятся людие, Божественныя крове.

Разрешены своя юзники Сионе испусти, и от рова неведения безводна изведи, и кроплением да обновятся людие, Божественныя крове.

Катавасиа: Возопиша с веселием праведных души: ныне миру завет новый завещается, и кроплением да обновятся людие, Божия крове.

Малая ектения.

Паки и паки миром Господу помолимся...

Кондак, глас 6

На престоле на Небеси, на жребяти на земли носимый Христе Боже, ангелов хваление, и детей воспевание приял еси зовущих ти: благословен еси грядый адама воззвати.

Икос:

Понеже ада связал еси Безсмертне, и смерть умертвил еси, и мир воскресил еси, с ваиами младенцы восхваляху Тя Христе, яко победителя, зовуще Ти днесь: осанна Сыну Давидову. Не ктому бо, рече, заклани будут младенцы, за младенца Мариина: но за вся младенцы и старцы, Един распинаешия. Не ктому на нас

вместится мечь: Твоя бо ребра прободутся копием. Темже радуящися глаголем: благословен грядый Адама въззвати.

Песнь 7

Ирмос: Спасый во огни авраамския Твоя отроки, и халдеи убив, яже правда праведно уловляше, препетый Господи Боже отец наших, благословен еси.

Покланяющися людие, и со ученки радуящися, ваием, осанна Сыну Давидову зовяху: препетый Господи Боже отец, благословен еси.

Неискусозлобное множество, еще младенствующее естество, Боголепно Тя Царю Израильтеский и ангельский воспет: препетый Господи Боже отец, благословен еси.

С ваием Тя Христе, ветвьми похваляху множества, благословен пришедый Царь веков. Вопияху же препетый Господи Боже отец, благословен еси.

Катавасиа: Спасый во огни авраамския Твоя отроки, и халдеи убив, яже правда праведно уловляше, препетый Господи Боже отец наших, благословен еси.

Песнь 8

Ирмос: Веселися Иерусалиме, торжествуйте любящии Сиона: царствуй бо во веки Господь сил прииде, да благоговет вся земля от лица его, и да вопиет: благословите вся дела Господня Господа.

На жребя младо всед Царь твой Сионе, предста Христос: безсловесную бо идольскую прелесть разрушити, и неудержанное стремление уставити всех язык прииде, во еже пети: вся дела пойте Господа.

Бог твой, радуйся Сионе зело, воцарися во веки Христос. Сей, якоже писано есть, кроткий и спасаый, праведный Избавитель наш, прииде на жребяти, конское свирепство убити врагов, не вопиющих: благословите вся дела Господня Господа.

Оскудевает Божественных ограждений, законопреступное сонмище непокоривых, понеже дом молитвы Божия, вертеп сотвориша разбойническ, от сердца Избавителя отринувше, Емуже вопием: благословите вся дела Господня Господа.

Хвалим, благословим, покланяемся Господеви, поюще и превозносяще во вся веки.

Катавасиа: Веселися Иерусалиме, торжествуйте любящии Сиона: царствуй бо во веки Господь сил прииде, да благоговет вся земля от лица его, и да вопиет: благословите вся дела Господня Господа.

Песнь 9

Ирмос: Бог Господь, и явися нам, составите праздник, и веселящися приидите, возвеличим Христа, с ваиами и ветвьми, песньми зовуще: благословен грядый во имя Господа Спаса нашего.

Языцы вскую шатаетеса писменницы, и священницы, почто тщетным поучитеса кто сей, рекше, Емуже дети с ваием и ветвьми, песньми зовут: благословен грядый во имя Господа Спаса нашего.

Сей Бог наш, Емуже никтоже подобен, праведный всяк путь изобрет, даде возлюбленному Израилю. По сих же с человеки поживе явлься: благословен грядый во имя Господа Спаса нашего.

Соблазны стези, что близ вас положисте непокоривии ноги ваша скоры кровь излияти Владычню: но воскреснет всяко спасти зовущия: благословен грядый во имя Господа Спаса нашего.

Катавасиа: Бог Господь, и явися нам, составите праздник, и веселящися приидите, возвеличим Христа, с ваиами и ветвьми, песньми зовуще: благословен грядый во имя Господа Спаса нашего.

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Глас 4. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):
На хвалитех стихире, глас 4

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Множество народа Господи, постилаху по пути ризы своя: друзии же резаху ветви от древес, и ношаху. Предыдущии же и последующии, зовяху глаголюще: осанна Сыну Давидову, благословен еси Пришедый, и паки Грядый во имя Господне.

Стих: Хвалите Бога во святых Его, хвалите Его во утверждении силы Его.

Множество народа Господи, постилаху по пути ризы своя: друзии же резаху ветви от древес, и ношаху. Предыдущии же и последующии, зовяху глаголюще: осанна Сыну Давидову, благословен еси Пришедый, и паки Грядый во имя Господне.

Стих: Хвалите Его на силах Его, хвалите Его по множеству величества Его.

Хотящу Тебе внити во Святой Град Господи, ветви садов людие ношаху, Тебе поюще всех Владыку: и зряще Тя на жребяти сидяща, якоже на херувимех зряху. Сего ради сице вопияху: осанна в вышних, благословен еси Пришедый, и паки Грядый во имя Господне.

Стих: Хвалите Его во гласе трубнем, хвалите Его во псалтири и гуслех.

Хотящу Тебе внити во Святой Град Господи, ветви садов людие ношаху, Тебе поюще всех Владыку: и зряще Тя на жребяти сидяща, якоже на херувимех зряху. Сего ради сице вопияху: осанна в вышних, благословен еси Пришедый, и паки Грядый во имя Господне.

Стих: Хвалите Его в тимпане и лице, хвалите Его во струнах и органе.

Изыдите языцы, изыдите и людие, и видите днесь Царя Небеснаго, яко на престоле висоце, на жребяти худе во Иерусалим входяща. Роде иудейский неверный и прелюбодейный, прииди и виждь, Егоже виде Исаиа во плоти нас ради приити имуща, како уневещает Себе, яко целомудренный новый Сион, и отлагает осужденную сонмицу: яко в нетленном же браце и нескверном, несквернии стекошася благохваляще, неискусозлобнии дети. С нимиже и мы поюще возопием песнь ангельскую: осанна в вышних, Имущему велию милость.

Стих: Хвалите Его в кимвалех доброголасных, хвалите Его в кимвалех восклицания: всякое дыхание да хвалит Господа.

Общее Воскресение, прежде вольныя страсти Твоя, во уверение всех предпоказавый Христе Боже, Лазаря убо в Вифании, державною силою Твоею, четверодневна мертв воскресил еси: слепцем же еже видети яко Светодавец даровал еси Спасе, и во Святой Град со ученки Твоими вшел еси, сидя на жребяти осли, пророческая исполняяй проповедания, якоже на херувимех носимый, и дети еврейстии с ветвми и ваиами предсретаху Тя. Темже и мы ветви масличныя носяще и ваиа, благодарственно Тебе вопием: осанна в вышних, благословен Грядый во имя Господне.

Слава и Ныне, глас 6

Прежде шести дней пасхи, прииде Иисус в Вифанию, и приступиша к нему ученцы его, глаголюще ему: Господи, где хощеша уготоваем Ти ясти Пасху он

же посла их, идите в преднюю весь, и обрящете человека скудель воды носяща, последуйте ему, и дому владыце рците: учитель глаголет, у тебе сотворю Пасху со ученики Моими.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемся, славословим Тя, благодарим Тя великия ради славы Твоя.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, вземляй грехи мира, помилуй нас.

Вземляй грехи мира, приими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святыи Безсмертный, помилуй нас. Святыи Боже, Святыи Крепкий, Святыи Безсмертный, помилуй нас!

Тропарь воскресный

Общее Воскресение, прежде Твоя страсти уверяя, из мертвых воздвигл еси Лазаря Христе Боже. Темже и мы яко отроцы победы знамения носяще, Тебе победителю смерти вопием: осанна в вышних, благословен Грядый во имя Господне.

Сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

Просительная ектения

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется Кондак , глас 6

На престоле на Небеси, на жребяти на земли носимый Христе Боже, ангелов хваление, и детей воспевание приял еси зовущих ти: благословен еси Грядый Адама воззвати.